

T 2511  
8243

CHINESE - JAPANESE LIBRARY OF  
HARVARD - YENCHING INSTITUTE  
AT HARVARD UNIVERSITY  
SEP 1 1938



蜀紀第八

通志八

先主

後主

先主姓劉諱備字玄德涿郡涿縣人漢景帝子中山靖王勝之後也勝子貞元狩六年封涿縣陸城亭侯坐酎金失侯因家焉先主祖雄父弘世仕州郡雄舉孝廉官至東郡范令先主少孤與母販履織席為業舍東南角籬上有桑樹生高五丈餘遙望見童童如小車蓋往來者皆怪此樹非凡或謂當出貴人先主少時與宗中諸小兒於樹下戲言吾必當乘此羽葆蓋車叔父子敬謂



曰汝勿妄語滅吾門也年十五母使行學與同宗劉德然遼西公孫瓚俱事故九江太守同郡盧植德然父元起常資給先主與德然等元起妻曰各自一家何能常爾邪起曰吾宗中有此兒非常人也而瓚深與先主相友瓚年長先主以兄事之先主不甚樂讀書喜狗馬音樂美衣服身長七尺五寸垂手下膝顧自見其耳少語言善下人喜怒不形於色好交結豪俠年少爭附之中山大商張世平蘇雙等貲累千金販馬周旋於涿郡見而異之乃多與之金財先主由是得用合徒衆靈帝不

黃巾起州郡各舉義兵先主率其屬從校尉鄒靖討黃巾賊有功除安喜尉督郵以公事到縣先主求謁不遇直入縛督郵杖二百解綬繫其頸著馬柳棄官亡命頃之大將軍何進遣都尉母丘毅詣丹楊募兵先主與俱行至下邳遇賊力戰有功除爲下密丞復去官後爲高唐尉遷爲令爲賊所破徃奔中郎將公孫瓚瓚表爲別部司馬使爲青州刺史田楷以拒冀州牧袁紹數有戰功試守平原令後領平原相郡民劉平素輕先主耻爲之下使客刺之客不忍刺語之而去其得人心如此袁

紹攻公孫瓚先主與田楷東屯齊曹公征徐州徐州牧  
陶謙遣使告急於田楷楷與先主俱救之時先主自有  
兵千餘人及幽州烏丸雜胡又略得飢民數千人既  
到謙以丹揚兵四千益先主先主遂去楷歸謙表先  
主爲豫州刺史屯小沛謙病篤謂別駕糜竺曰非劉備  
不能安此州也謙死竺率州人迎先主先主未敢當下  
邳陳登謂先主曰今漢室陵遲海內傾覆立功立事在  
於今日鄙州殷富戶口百萬欲屈使君撫臨州事先主  
哀公路近在壽春此君四世五公海內所歸君可

州與之登曰公路驕豪非治亂之主今欲爲使君合步  
騎十萬上可以匡主濟民成五霸之業下可以割地守  
境書功於竹帛若使君不見聽許登亦未敢聽使君也  
北海相孔融謂先主曰袁公路豈憂國忘家者邪冢中  
枯骨何足介意今日之事百姓與能天與不取悔不可  
追先主遂領徐州袁術來攻先主先主拒之於盱眙淮  
陰曹公表先主爲鎮東將軍封宜城亭侯是歲建安元  
年也先主與術相持經月呂布乘虛襲下邳守將曹豹  
反開迎布布虜先主妻子先主轉軍海西揚奉韓暹寇

徐揚間先主邀擊盡斬之先主求和於呂布布還其妻  
子先主遣關羽守下邳先主還小沛復合兵得萬餘人  
呂布惡之自出兵攻先主先主敗走歸曹公曹公厚遇  
之以爲豫州牧將至沛收散卒給其軍糧益與兵使東  
擊布布遣高順攻之曹公遣夏侯惇往不能救爲順所  
敗復虜先主妻子送布曹公自出東征助先主圍布於  
下邳生禽布先主復得妻子從曹公還許表先主爲左  
將軍禮之愈重出則同輿坐則同席表術欲經徐州北  
就袁紹曹公遣先主督朱靈路招要擊術未至術病死

先主未出時獻帝舅車騎將軍董承辭受帝衣帶中密  
詔當誅曹公先主未發是時曹公從容謂先主曰今天  
下英雄惟君與操耳本初之徒不足數也先主方食失  
匕箸遂與承及長水校尉种輯將軍吳子蘭王子服等  
同謀會見使未發事覺承等皆伏誅先主據下邳靈等  
還先主乃殺徐州刺史車胄留關羽守下邳而身還小  
沛東海昌霸反郡縣多叛曹公爲先主衆數萬人遣孫  
乾與袁紹連和曹公遣劉岱王忠擊之不克五年曹公  
東征先主先主敗績曹公盡收其衆虜先主妻子并禽

關羽以歸先主走青州青州刺史袁譚先主故茂才也  
將步騎迎先主先主隨譚到平原譚馳使白紹紹遣將  
道洛奉迎身去鄴二百里與先主相見駐月餘日所失  
亡一三新集曹公與袁紹相拒於官渡汝南黃巾  
劉辟等叛曹公應紹紹遣先主將兵與辟等略許下關  
羽亡歸先主曹公遣曹仁將兵擊先主先主還紹軍陰  
欲離紹乃說紹南連荊州牧劉表紹遣先主將本兵復  
至汝南與賊龔都等合衆數千人曹公遣蔡楊擊之爲  
先主所殺曹公既破紹紹自南擊先主先主遣糜竺孫  
乾與劉表相聞表自郊迎以上賓禮待之益其兵使出  
新野荊州豪傑歸先主者日益多表疑其心陰禦之使  
拒夏侯惇于禁等於惇望久之先主設伏兵一旦自燒  
屯僞遁惇等追之爲伏兵所破

十二年曹公北征烏丸先主說表襲許表不能用曹公  
南征表會表卒子琮代立遣使請降先主屯樊不知曹  
公卒至至宛乃聞之遂將其衆去過襄陽諸葛亮說先  
主攻琮荊州可有先主曰吾不忍也乃駐馬呼琮琮懼  
不能起琮左右及荊州人多歸先主比到當陽衆十餘

萬輜重數千兩日行十餘里別遣關羽乘船數百艘使會江陵或謂先主曰宜速行保江陵今雖擁大衆被甲者少若曹公兵至何以拒之先主曰夫濟大事必以人為本今人歸吾吾何忍棄去曹公以江陵有軍實恐先主據之乃釋輜重輕軍到襄陽聞先主已過曹公將精騎五千急追之一日一夜行三百餘里及於當陽之長坂先主棄妻子與諸葛亮張飛趙雲等數十騎走曹公大獲其人衆輜重先主斜趣漢津適與羽船會得濟沔遇表長子江夏太守琦衆萬餘人與俱到夏口先主遣

諸葛亮自結於孫權權遣周瑜程普等水軍數萬與先主并力與曹公戰于赤壁大破之焚其舟船先主與吳軍水陸并進追到南郡時又疾疫北軍多死曹公引歸先主表琦為荊州刺史又南征四郡武陵太守金旋長沙太守韓玄桂陽太守趙範零陵太守劉度皆降廬江雷緒率部曲數萬口稽顙琦病死群下推先主為荊州牧治公安權稍畏之進妹固好先主至京見權綢繆恩紀權遣使云欲共取蜀或以為宜報聽許吳終不能越荆有蜀蜀地可為已有荊州主簿殷觀進曰若為吳先驅

進未能克蜀退爲吳所乘即事去矣今但可然贊其伐蜀而自說新據諸郡未可與動吳必不敢越我而獨取蜀如此進退之計可以收吳蜀之利先主從之權果輟計遷觀爲別駕從事

十六年益州牧劉璋遙聞曹公將遣鍾繇等向漢中討張魯內懷恐懼別駕從事蜀郡張松說璋曰曹公兵彊無敵於天下若因張魯之資以取蜀土誰能禦之者乎璋曰吾固憂之而未有計松曰劉豫州使君之宗室而曹公之深讎也善用兵若使之討魯魯必破魯破則益

州疆曹公雖來無能爲也璋然之遣法正將四千人迎先主前後賂遺以巨億計正因陳益州可取之策先主留諸葛亮關羽等據荊州將步卒數萬人入益州至涪璋自出迎相見甚歡張松令法正白先主及謀臣龐統進說便可於會所襲璋先主曰此大事也不可倉卒璋推先主行大司馬領司隸校尉先主亦推璋行鎮西大將軍領益州牧璋增先主兵使擊張魯又令督白水軍先主并軍三萬餘人車甲器械資貨甚盛是歲璋還成都先主北到葭萌未即討魯厚樹恩德以收衆心明年



曹公征孫權權呼先主自救先主遣使告璋曰曹公征  
吳吳憂危急孫氏與孤本爲唇齒又樂進在青泥與關  
羽相拒今不往救羽進必大克轉侵州界其憂有甚於  
魯魯自守之賊不足慮也乃從璋求萬兵及資寶欲以  
東行璋但許兵四千其餘皆給半張松書與先主及法  
正曰今大事垂可立如何釋此去乎松兄廣漢太守肅  
懼禍逮已白璋發其謀於是璋收斬松嫌隙始構矣璋  
勅關成諸將文書勿復關通先主先主大怒召璋白水  
軍督楊懷責以無禮斬之乃使黃忠卓膺勒兵向璋先  
主徑至關中質諸將并士卒妻子引兵與忠膺等進到  
涪據其城璋遣劉瓚冷苞張任鄧賢等拒先主於涪皆  
破敗退保縣竹璋復遣李嚴督縣竹諸軍嚴率衆降先  
主先主軍益彊分遣諸將平下屬縣諸葛亮張飛趙雲  
等將兵泝流定白帝江州江陽惟關羽留鎮荊州先主  
進軍圍雒時璋子循守城被攻一年

十九年夏雒城破進圍成都數十日璋出降蜀中殷盛  
豐樂先主置酒大饗士卒取蜀城中金銀分賜將士還  
其穀帛先主復領益州牧諸葛亮爲股肱法正爲謀主

關羽張飛馬超爲爪牙許靖麋竺簡雍爲賓友及董和黃權李嚴等本璋之所授用也吳壹費觀等又璋之婚親也彭羨又璋之所排擯也劉巴者宿昔之所忌恨也皆處之顯任盡其器能有志之士無不競勸

二十年孫權以先主已得益州使使報欲得荊州先主言須得涼州當以荊州相與權忿之乃遣呂蒙襲奪長沙零陵桂陽三郡先主引兵五萬下公安令關羽入益陽是歲曹公定漢中張魯遁走巴西先主聞之與權連和分荊州江夏長沙桂陽東屬南郡零陵武陵西屬引

軍還江州遣黃權將兵迎張魯張魯已降曹公曹公使夏侯淵張郃屯漢中數數犯暴巴郡先主令張飛進兵宕渠與郃等戰於瓦口破郃等收兵還南鄭先主亦還成都

二十三年先主率諸將進兵漢中分遣將軍吳蘭雷銅等入武都皆爲曹公軍所沒先主次于陽平關與淵郃等相拒

二十四年春自陽平南渡沔水緣山稍前於定軍山勢作營淵將兵來爭其地先主命黃忠乘高鼓譟攻之大

破淵軍斬淵郤及曹公所署益州刺史趙顛等曹公自  
長安舉衆南征先主遙策之曰曹公雖來無能爲也我  
必有漢川矣及曹公至先主歛衆拒險終不交鋒積月  
不拔亡者日多夏曹公引軍還先主遂有漢中遣劉封  
孟達李平等攻申耽於上庸秋群下上先主爲漢中王  
表於漢帝曰平西將軍都亭侯臣馬超左將軍領長史  
鎮軍將軍臣許靖營司馬龐羲議曹從事中郎軍議中  
郎將臣射援軍師將軍臣諸葛亮盪寇將軍漢壽亭侯  
臣關羽征虜將軍新亭侯臣張飛征西將軍臣黃忠鎮

遠將軍臣賴恭揚武將軍臣法正興業將軍臣李嚴等  
一百二十人上言曰昔唐堯至聖而四凶在朝周成仁  
賢而四國作難高后稱制而諸呂竊命孝昭幼冲而上  
官逆謀皆馮世寵藉履國權窮凶極亂社稷幾危非大  
舜周公朱虛博陸則不能流放禽討安危定傾伏惟陛  
下誕資聖德統理萬邦而遭厄運不造之艱董卓首難  
蕩覆京畿曹操階禍竊執天衡皇后太子鳩殺見害剝  
亂天下殘毀民物久令陛下蒙塵憂厄幽處虛邑人神  
無主遏絕王命厭昧皇極欲盜神器左將軍領司隸校

尉豫荆益三州牧宜城亭侯備受朝爵秩念在輸力以  
殉國難覩其機兆赫然憤發與車騎將軍董承同謀誅  
操將安國家克寧舊都會承機事不密令操游覓得遂  
長惡殘浪海內臣等每懼王室大有閻樂之禍小有定  
安之變夙夜惴惴戰慄累息昔在虞書敷序九族周監  
二代封建同姓書著其義歷載長久漢興之初割裂疆  
土尊王子弟是以卒折諸呂之難而成太宗之基臣等  
以備肺腑枝葉宗子藩翰心存國家念在弭亂自操破  
於漢中海內英雄望風蟻附而爵號不顯九錫未加非

所以鎮衛社稷光昭萬世也奉辭在外禮命斷絕音河  
西太守梁統等值漢中興限於山河位同權均不能相  
率咸推竇融以爲元帥卒立效績摧破隗囂今社稷之  
難急於隴蜀操外吞天下內殘群寮朝廷有蕭牆之危  
而禦侮未建可爲寒心臣等輒依舊典封備漢中王拜  
大司馬董齊六軍糾合同盟埽滅凶逆以漢中巴蜀廣  
漢犍爲爲國所署置依漢初諸侯王故典夫權宜之制  
苟利社稷專之可也然後功成事立臣等退伏矯罪雖  
死無恨遂於沔陽設壇場陳兵列衆群臣陪位讀奏訖

御王冠于先主先主於是列群臣之言因驛上還所假  
左將軍宜城亭侯印綬於是還治成都拔魏延爲都督  
鎮漢中時關羽攻曹公將曹仁禽于禁於樊俄而孫權  
襲殺羽取荊州

二十五年魏文帝稱尊號改年曰黃初或傳聞漢帝見  
害先主乃發喪制服追謚曰孝愍皇帝是後在所並言  
衆瑞日月相屬故議郎陽泉侯劉豹青衣侯向舉偏將  
軍張裔黃權大司馬屬毅純益州別駕從事趙苻治中  
從事楊洪從事祭酒何宗議曹從事杜瓊勸學從事張

爽尹默譙周等上言曰臣等謹按河圖洛書五經讖諱  
衆說並有大王名字又參諸星氣之論法當有聖人起  
於此州以致中興願大王應天順民速即洪業以寧海  
內於是太傅許靖安漢將軍麋竺軍師將軍諸葛亮太  
常賴恭光祿勳黃權少府王謀等復上言曹丕篡弒湮  
滅漢室竊據神器劫迫忠良酷烈無道人鬼患毒咸思  
劉氏今上無天子海內惶惶靡所式仰群下前後上言  
者八百餘人咸稱述符瑞圖讖明徵聞黃龍見武陽赤  
水九月乃去孝經接神契曰德至淵泉則黃龍見龍者

君之象也。易乾九五飛龍在天，大王當龍升登帝位也。又前關羽圍樊襄陽，襄陽男子張嘉王休獻玉璽，璽潛漢水，伏於淵泉，暉景燭耀，靈光徹天。夫漢者高祖本所起，定天下之國號也。大王襲先帝軌跡，亦興於漢中也。今天子玉璽神光先見，璽出襄陽，漢水之末，明大王承其下流，授與大王以天子之位，瑞命符應，非人力所致。昔周有烏魚之瑞，成曰休哉。二祖受命，圖書先著，以爲徵驗。今上天告祥，群儒英俊並進，河洛孔子識記咸悉。具至伏惟大王出自孝景皇帝中山靖王之胄，本枝百

世乾祇降祚，聖姿碩茂，神武在躬，仁覆積德，愛人好士，是以四方歸心焉。考省靈圖，啓發識緯，神明之表名諱昭著，宜即帝位，以纂二祖紹嗣。昭穆天下，幸甚。臣等謹與博士許慈議，郎孟光建立禮儀，擇令辰上尊號，即皇帝位於成都武擔之南，爲文曰：惟建安二十六年四月丙午，皇帝備敢用玄牡，昭告皇天上帝后土神祇。漢有天，下歷數無疆，曩者王莽篡盜光武皇帝，震怒致誅，社稷復存。今曹操阻兵安忍，戮殺主后，滔天泯夏，罔顧天顯。操子丕載其凶逆，竊居神器，群臣將士以爲社稷廢

備宜脩之嗣武二祖襲行天罰備雖否德懼忝帝位詢于庶民外及蠻夷君長僉曰天命不可以不答祖業不可以久替四海不可以無主率土式望在備一人備畏天明命又懼漢邦將湮于地謹擇元日與百寮登壇受皇帝璽綬脩燔瘞告類于天神惟神嚮祚于漢家永綏四海

章武元年夏四月大赦改年以諸葛亮為丞相許靖為司徒置百官立宗廟祫祭高皇帝以下五月立皇后吳氏子禪為皇太子六月以子亮為魯王理為梁王車騎將軍張飛為其左右所害初先主忿孫權之襲關羽將東征秋七月遂帥諸軍伐吳孫權遣書請和先主盛怒不許吳將陸議李異劉阿等屯巫秭歸將軍吳班馮習自巫攻破異等軍次秭歸武陵五谿蠻夷遣使請兵二年春正月先主軍還秭歸將軍吳班陳式水軍屯夷陵夾江東西岸二月先主自秭歸率諸將進軍緣山截嶺於夷道猓亭駐營自猓山通武陵遣侍中馬良安慰五谿蠻夷咸相率響應鎮北將軍黃權督江北諸軍與吳軍相拒於夷陵道夏六月黃氣見自秭歸十餘里中

廣數十丈後十餘日陸議大破先主軍於猗亭將軍馮  
習張南等皆沒先主自猗亭還秭歸收合離散兵遂棄  
船舫由步道還魚復改魚復縣曰永安吳遣將軍李異  
劉阿等踵躡先主軍屯駐南山秋八月收兵還巫司徒  
許靖卒冬十月詔丞相亮營南北郊於成都孫權聞先  
主住白帝甚懼遣使請和先主許之遣太中大夫宗瑋  
報命冬十二月漢嘉太守黃元聞先主疾不豫舉兵拒  
守

三年春二月丞相亮自成都到永安三月黃元進兵攻  
臨邛縣遣將軍陳習討元元軍敗順流下江爲其親兵  
所縛生致成都斬之先主病篤託孤於丞相亮尚書令  
李嚴爲副夏四月癸巳先主殂于永安宮時年六十三  
亮上言於後主曰伏惟大行皇帝邁仁樹德覆燾無疆  
昊天不弔寢疾彌留今月二十四日奄忽升遐臣妾號  
咷若喪考妣乃顧遺詔事惟太宗動容損益百寮發哀  
滿三日除服到葬期復如禮其郡國太守相都尉縣令  
長三日便除服臣亮親受勅戒不敢有違請宣下奉行  
五月梓宮自永安還成都謚曰昭烈皇帝秋八月葬惠陵



先主章武三年

後主諱禪字公嗣先主子也建安二十四年先主爲漢中王立爲王太子及即尊號冊曰惟章武元年五月辛巳皇帝若曰太子禪朕遭漢運艱難賊臣篡盜社稷無主洛人群正以天明命朕繼大統今以禪爲皇太子以承宗廟祗肅社稷使使持節丞相亮授印綬敬聽師傅行一物而三善皆得焉可不勉與三年夏四月先主殂于永安宮五月後主襲位於成都時年十七尊皇后曰皇太后大赦改元是歲魏黃初四年也

建興元年夏牂柯太守朱褒擁郡反先是益州郡有六姓雍闓反流太守張裔於吳據郡不賓越雋夷王高定亦背叛是歲立皇后張氏遣尚書郎鄧芝固好於吳吳王孫權與蜀和親使聘是歲通好

二年春務農殖穀閉關息民

三年春三月丞相亮南征四郡四郡皆平改益州郡爲建寧郡分建寧永昌郡爲雲南郡又分建寧牂柯爲興古郡十二月亮還成都

四年春都護李嚴自永安還住江州築大城

五年春丞相亮出屯漢中營沔北陽平石馬

六年春亮出攻祁山不克冬復出散關圍陳倉糧盡退魏將王雙率軍追亮亮與戰破之斬雙還漢中

七年春亮遣陳式攻武都陰平遂克定二郡冬亮徙府營於南山下原上築漢樂二城是歲孫權稱帝與蜀約盟共交分天下

八年秋魏使司馬懿由西城張郃由子午曹真由斜谷欲攻漢中丞相亮待之於城固赤阪大雨道絕真等皆還是歲魏延破魏雍州刺史郭淮于陽谿徙魯王永為

甘陵王梁王理為安平王皆以魯梁在吳分界故也

九年春二月亮復出軍圍祁山始以木牛運魏司馬懿張郃救祁山夏六月亮糧盡退軍郃追至青封與亮交戰被箭死秋八月都護李平廢徙梓潼郡

十年亮休士勸農於黃沙作流馬木牛畢教兵講武

十一年冬亮使諸軍運米集於斜谷口治斜谷邸閣是歲南夷劉胄反將軍馬忠破平之

十二年春二月亮由斜谷出始以流馬運秋八月亮卒于渭濱征西大將軍魏延與丞相長史楊儀爭權不和

舉兵相攻延敗走斬延首儀率諸軍還成都大赦以左將軍吳壹為車騎將軍假節都督漢中以丞相留府長史蔣琬為尚書令總統國事

十三年春正月中軍師楊儀廢徙漢嘉郡夏四月進蔣琬位為大將軍

十四年夏四月後主至渝登觀阪看汶水之流旬日還成都徙武都氏王苻健及氏民四百餘戶於廣都

十五年夏六月皇后張氏薨

延熙元年春正月立皇后張氏大赦改元立子璿為太子

子子瑤為安定王冬十一月大將軍蔣琬出屯漢中

二年春三月進蔣琬位為大司馬

三年春使越雋太守張嶷平定越雋郡

四年冬十月尚書令費禕至漢中與蔣琬諮論事計歲盡還

五年春正月監軍姜維督偏軍自漢中還屯涪縣

六年冬十月大司馬蔣琬自漢中還住涪十一月大赦以尚書令費禕為大將軍

七年閏月魏大將軍曹爽夏侯玄等向漢中鎮北大將

軍王平拒興勢圍大將軍費禕督諸軍往赴救魏軍退  
夏四月安平王理卒秋九月禕還成都

八年秋八月皇太后薨十一月大將軍費禕至漢中行  
圍守

九年夏六月費禕還成都秋大赦冬十一月大司馬蔣  
琬卒

十年涼州胡王白虎文治無戴等率衆降衛將軍姜維  
迎逆安撫居之于繁縣是歲汶山平康夷反維往討破  
平之

十一年夏五月大將軍費禕出屯漢中秋涪陵屬國民  
夷反車騎將軍鄧芝往討皆破平之

十二年春正月魏誅大將軍曹爽等右將軍夏侯霸來  
降夏四月大赦秋衛將軍姜維出攻雍州不克而還將  
軍句安李韶降魏

十三年姜維復出西平不克而還

十四年夏大將軍費禕還成都冬復北駐漢壽大赦

十五年吳王孫權薨立子琮為西河王

十六年春正月大將軍費禕為魏降人郭循所殺于漢

壽夏四月衛將軍姜維復率眾圍南安不克而還

十七年春正月姜維還成都大赦夏六月維復率眾出

隴西冬拔狄道河間臨洮三縣民居于縣竹繁縣

十八年春姜維還成都夏復率諸軍出狄道與魏雍州

刺史王經戰于洮西大破之經退保狄道城維却住鍾

題

十九年春進姜維位為大將軍督戎馬與鎮西將軍胡

濟期會上邽濟失誓不至秋八月維為魏大將軍鄧

所破于上邽維退軍還成都是歲立子瓚為新平二六

赦

二十年聞魏大將軍諸葛誕據壽春以叛姜維復率眾

出駱谷至芒水是歲大赦

景耀元年姜維還成都史官言景星見於是大赦改年

宦人黃皓始專政吳大將軍孫綝廢其主亮立琅邪王

休

二年夏六月立子諶為北地王恂為新興王虔為上黨

王

三年秋九月追謚故將軍關羽張飛馬超龐統黃忠

四年春三月追謚故將軍趙雲冬十月大赦

五年春正月西河王琮卒是歲姜維復率衆出侯和爲  
鄧艾所破還住沓中

六年夏魏大興徒衆命征西將軍鄧艾鎮西將軍鍾會  
雍州刺史諸葛緒數道並攻於是遣左右車騎將軍張  
翼廖化輔國大將軍董厥等拒之大赦改元爲炎興冬  
鄧艾破衛將軍諸葛瞻於綿竹用光祿大夫譙周策使  
侍中張紹駙馬都尉鄧良及周奉降書于艾是日北地  
王謚傷國之亡先殺妻子次以自殺紹良與艾相遇於

維縣艾得書大喜即報書遣紹良先還艾至城北後主  
輿襯自縛詣軍壘門艾解縛焚襯延請相見因承制拜  
後主爲驃騎將軍諸圍守悉被後主勅然後降下艾使  
後主止其故宮身往造焉資嚴未發明年春正月艾見  
取鍾會自涪至成都作亂會既死蜀中軍衆鈔略死喪  
狼藉數日乃安集後主舉家東遷既至洛陽魏策命後  
主爲安樂縣公食邑萬戶賜絹萬匹奴婢百人他物稱  
是子孫爲三都尉封侯者五十餘人尚書令樊建侍中  
張紹光祿大夫譙周祕書令郤正殿中督張通並封列

後主以太始七年薨於洛陽陳壽評曰後主任賢相則為循理之君惑闇豎則為昏闇之后傳曰素絲無常唯所染之信矣哉禮國君繼體踰年改元而章武之三年則革稱建興考之古義體理為違又國不置史注記無官是以行事多遺災異靡書諸葛亮雖達於為政凡此之類猶有未周焉然經載十二而年名不易軍旅屢興而赦不妄下不亦卓乎自亮沒後茲制漸虧優劣著矣

後主建興十五年延熙二十年景耀六年即位曰十

一年

右蜀二主四十二年為魏所滅

蜀紀第八

通志八

吳紀第九

通志九

孫堅

孫策

大帝

會稽王

景帝

歸命侯

孫堅字文臺吳郡富春人蓋孫武之後也少為縣吏年十七與父共載船至錢唐會海賊胡玉等從匏里上掠取賈人財物方於岸上分之行旅皆住船不敢進堅謂父曰此賊可擊請討之父曰非爾所圖也堅行操刀上岸以手東西指麾若分部人兵以羅遮賊狀賊望見以為官兵捕之即委財物散走堅追斬得一級以還父大



驚由是顯聞府召署假尉會稽妖賊許昌起於句章自稱陽明皇帝與其子韶扇動郡縣衆以萬數堅以郡司馬募召精勇得千餘人與州郡合討破之是歲熹平元年也刺史臧旻列上功狀詔書除堅鹽漬丞數歲徙盱眙丞又徙下邳丞中平元年黃巾賊帥張角起於魏郡託有神靈遣八使以善道教化天下而潛相連結自稱黃天泰平三月甲子三十六萬一旦俱發天下響應燔燒郡縣殺害長吏漢遣車騎將軍皇甫嵩中郎將朱雋將兵討擊之雋表請堅爲佐軍司馬鄉里少長隨在下

邳者皆願從堅又募諸商旅及淮泗精兵合千餘人與雋并力奮擊所向無前汝潁賊困迫走保宛城堅身嘗一面登城先入衆乃蟻附遂大破之雋具以狀聞上拜堅別部司馬邊章韓遂作亂涼州中郎將董卓拒討無功中平三年遣司空張溫行車騎將軍西討章等溫表請堅與參軍事屯長安溫以詔書召卓卓良久乃詣溫溫責讓卓卓應對不順堅時在坐前耳語謂溫曰卓不怖罪而鴟張大語宜以召不時至陳軍法斬之溫曰卓素著威名於隴蜀之間今可殺之西行無依堅曰明公

親率王兵威震天下何賴於卓觀卓所言不假明公輕  
上無禮一罪也章遂跋扈經年當以時進討而卓云未  
可沮軍疑衆二罪也卓受任無功應召稽留而軒昂自  
高三罪也古之名將仗鉞臨衆未有不斬以示威者  
也是以穰苴斬莊賈魏絳戮楊干今明公垂意於卓不  
即加誅虧損威刑於是在矣温不忍發舉乃曰君且還  
卓將疑人堅因起出章遂聞大兵當至黨衆離散皆乞  
降軍還議者以軍未臨敵不斷功賞然聞堅數卓三罪  
勸温斬之無不歎息拜堅議郎時長沙賊區星自稱將

軍衆萬餘人攻圍城邑乃以堅為長沙太守到郡親率  
將士施設方略旬月之間克破星等周朝郭石亦帥徒  
衆起於零桂與星相應遂越境尋討三郡肅然漢朝錄  
前後功封堅烏程侯靈帝崩卓擅朝政橫恣京城諸州  
郡並興義兵欲以討卓堅亦舉兵荊州刺史王叡素遇  
堅無禮堅過殺之比至南陽衆數萬人南陽太守張咨  
聞軍至晏然自若堅以牛酒禮咨咨明日亦荅詣堅酒  
酣長沙主簿入白堅前移南陽而道路不治軍資不具  
請收主簿推問意故咨大懼欲去兵陳四周不得出有

頃主簿復入白堅南陽太守稽停義兵使賊不時討請  
取出案軍法從事便牽咨於軍門斬之郡中震慄無求  
不獲前到魯陽與袁術相見術表堅行破虜將軍領豫  
州刺史遂治兵於魯陽城當進軍討卓遣長史公仇稱  
將卒從事還州督促軍糧施帳幔於城東門外祖道送  
稱官屬並會卓遣步騎數萬人逆堅輕騎數十先到堅  
方行酒談笑勅部曲整頓行陣無得妄動後騎漸益堅  
徐罷坐導引入城乃謂左右曰向堅所以不即起者恐  
兵相蹈藉諸君不得入耳卓兵見堅士衆甚整不敢攻

城乃引還堅移屯梁東大爲犒軍所攻堅與數十騎潰  
圍而出堅常著赤罽幘乃脫幘令親近將祖茂著之卓  
騎爭逐茂故堅從間道得免茂困迫下馬以幘冠冢間  
燒柱因伏草中卓騎望見圍繞數重定近覺是柱乃去  
堅復相收兵合戰於陽人大破卓軍梟其都督華雄等  
是時或問堅於術術懷疑不運軍糧陽人去魯陽百餘  
里堅夜馳見術畫地計校曰所以出身不顧上爲國家  
討賊下慰將軍家門之私讎堅與卓非有骨肉之怨也  
而將軍受譖潤之言還相嫌疑術蹶蹶即調發軍糧堅

遂屯卓憚堅猛壯乃遣將軍李傕等來求和親令堅列  
疏子弟任刺史郡守者許表用之堅曰卓逆天無道湯  
覆王室今不夷汝三族縣示四海則吾死不瞑日豈將  
與乃和親邪復進軍大谷拒雒九十里卓尋徙都長安焚  
燒雒邑堅前修諸陵平塞卓所發掘訖引軍還住魯陽  
初平三年術使堅征荊州擊劉表表遣黃祖逆於樊鄧  
之間堅擊破之追渡漢水遂圍襄陽單馬行峴山為祖  
軍士所射殺兄子賁帥將士眾就術術復表賁為豫州  
刺史堅四子策權翊匡權既稱尊號謚堅曰武烈皇帝

策字伯符堅初興義兵策將母徙居舒與周瑜相友收  
合士大夫江淮間人咸向之堅薨還葬曲阿乃渡江居  
江都徐州牧陶謙深忌策策舅吳景時為丹楊太守策  
乃載母徙曲阿與呂範孫河俱就景因緣召募得數百  
人興平元年從袁術術甚竒之以堅部曲還策太傅馬  
日磔杖節安集關東在壽春以禮辟策表拜懷義校尉  
術大將喬蕤張勳皆傾心敬焉術常歎曰使術有子如  
孫郎死復何恨策騎士有罪逃入術營隱於內廐策指  
使人就斬之訖詣術謝術曰兵人好叛當共疾之何為

謝也由是軍中益畏憚之術初許策爲九江太守已而  
更用丹楊陳紀後術欲攻徐州從廬江太守陸康求米三  
萬斛康不與術大怒策昔曾詣康康不見使主簿接之  
策常銜恨術遣策攻康謂曰前錯用陳紀每恨本意不  
遂今若得康廬江真卿有也策攻康拔之術復用其故  
吏劉勲爲太守策益失望先是劉繇爲揚州刺史州舊  
治壽春壽春術已據之繇乃渡江治曲阿時吳景尚在  
丹楊策從兄賁又爲丹楊都尉繇至皆追逐之景賁退  
舍歷陽繇遣樊能于糜陳橫屯江津張英屯當利口以

拒術術自用故吏琅邪惠衢爲揚州刺史更以景爲督  
軍中郎將與賁共將兵擊英等連年不克策乃說術乞  
助景等平定江東術表策爲折衝校尉行殄寇將軍兵  
財千餘騎數十匹賓客願從者數百人比至歷陽衆五  
六千策母先自由阿徙於歷陽策又徙母阜陵渡江轉  
鬪所向皆破莫敢當其鋒而軍令整肅百姓懷之策爲  
人美姿顏好笑語性闊達聽受善於用人是以士民見  
者莫不盡心樂爲致死劉繇棄軍遁逃諸郡守皆捐城  
郭奔走吳人嚴白虎等衆各萬餘人處處屯聚吳景等

欲先擊破虎等乃至會稽策曰虎等群盜非有大志此成禽耳遂引兵渡浙江據會稽屬東冶乃攻破虎等盡更置長吏策自領會稽太守復以吳景為丹楊太守以孫賁為豫章太守分豫章為廬陵郡以賁弟輔為廬陵太守丹楊朱治為吳郡太守彭城張昭廣陵張紘秦松陳端等為謀主時袁術僭號策以書責而絕之曹公表策為討逆將軍封為吳侯後術死長史楊弘大將張勳等將其眾欲就策廬江太守劉勳要擊悉虜之收其珍寶以歸策聞之偽與勳好盟勳新得術眾時豫章上繇

宗民萬餘家在江東策勸勳攻取之勳既行策輕軍是夜罷拔廬江勳眾盡降勳獨與麾下數百人自歸曹公是時袁紹方彊而策并江東曹公力未能逞且欲撫之乃以女弟配策小弟匡又為子章取賁女皆禮辟策弟攸翊又命揚州刺史嚴象舉權茂才建安五年曹公與袁紹相拒於官渡策陰欲罷許迎漢帝密治兵部署諸將未發會為故吳郡太守許貢客所殺先是策殺貢貢小子與客亡匿江邊策單騎出卒與客遇客擊傷策創甚請張昭等謂曰中國方亂夫以吳越之眾三江之固

足以觀成敗公等善相吾弟呼權佩以印綬謂曰舉江東之衆決機於兩陳之間與天下爭衡卿不如我舉賢任能各盡其心以保江東我不如卿至夜時卒時年二十六權稱尊號追謚策曰長沙桓王封子紹爲吳侯後改封上虞侯紹卒子奉嗣孫皓時訛言奉當立誅死大皇帝諱權字仲謀兄策既定諸郡時權年十五以爲陽羨長郡察孝廉州舉茂才行奉義校尉漢以策遠脩職貢遣使者劉琬加錫命琬語人曰吾觀孫氏兄弟雖各才秀明達然皆祿祚不終惟中弟孝廉形貌竒偉骨

體不恒有六貴之表年又最壽爾試識之

建安四年從策征廬江太守劉勲勲破進討黃祖於沙羨

五年策薨以事授權權哭未及息策長史張昭謂權曰孝廉此寧哭時邪且周公立法而伯禽不師非欲違父時不得行也况今姦宄競逐豺狼滿道乃欲哀親感顧禮制是猶開門而揖盜未可以爲仁也乃改易權服扶令上馬使出巡軍是時惟有會稽吳郡丹楊豫章廬陵然深險之地猶未盡從而天下英豪布在州郡賓旅寄

寓之士以安危去就為意未有君臣之固張昭周瑜等  
謂權可與共成大業故委心而服事焉曹公表權為討  
盧將軍領會稽太守屯吳使丞之郡行文書事待張昭以  
師傳之禮而周瑜程普呂範等為將率招延俊秀聘求  
名士魯肅諸葛瑾等始為賓客分部諸將鎮撫山越討  
不從命

七年權母吳氏薨

八年權西伐黃祖破其舟軍惟城未克而山寇復動還  
過豫章使呂範平鄱陽會稽程普討樂安太史慈領海

昏韓當周泰呂蒙等為劇縣令長

九年權弟丹揚太守翊為左右所害以從兄瑜代翊

十年權使賀齊討上饒分為建平縣

十二年西征黃祖虜其人民而還

十三年春權復征黃祖祖先遣舟兵拒軍都尉呂蒙破  
其前鋒而凌統董襲等盡銳攻之遂屠其城祖挺身亡  
走騎士馮則追梟其首虜其男女數萬口是歲使賀齊

討黠歙黠音伊 歙音攝分歙為始新新定犁陽休陽縣以六縣

為新都郡荊州牧劉表死魯肅乞奉命弔表二子且以



觀變肅未到而曹公已臨其境表子琮舉衆以降劉備  
欲南濟江肅與相見因傳權旨爲陳成敗備進住夏口  
使諸葛亮詣權遣周瑜程普等行是時曹公新得表衆  
形勢甚盛諸議者皆望風畏憚多勸權迎之惟瑜肅執  
拒之之議意與權同瑜普爲左右督各領萬人與備俱  
進遇於赤壁大破曹公軍曹公燒其餘船引退士卒饑  
疫死者大半備瑜等復追至南郡曹公遂北還留曹仁  
徐晃於江陵使樂進守襄陽時甘寧在夷陵爲仁黨所  
圍用呂蒙計留凌統以拒仁以其半救寧軍以勝反權  
至權退

自率衆圍合肥使張昭攻九江之當塗昭兵不利權攻  
城踰月不能下曹公自荊州還遣張喜將騎赴合肥未  
至權退  
十四年瑜仁相守歲餘所殺傷甚衆仁委城走權以瑜  
爲南郡太守劉備表權行車騎將軍領徐州牧備領荆  
州牧屯公安  
十五年分豫章爲鄱陽郡分長沙爲漢昌郡以魯肅爲  
太守屯陸口

十六年權徙治秣陵明年城石頭改秣陵爲建業聞曹

通志吳紀卷第九  
公將來侵作濡須塢

十八年正月曹公攻濡須權與相拒月餘曹公望權軍  
歎其齊肅乃退初曹公恐江濱郡縣爲權所略徵令內  
移民轉相驚自廬江九江蘄春廣陵戶十餘萬皆東渡  
江江西遂虛合肥以南惟有皖城

十九年五月權征皖城閏月克之獲廬江太守朱光及  
參軍董和男女數萬口是歲劉備定蜀權以備已得益  
州令諸葛瑾從求荊州諸郡備不許曰吾方圖涼州涼  
州定乃蓋以荊州與吳耳權曰此假而不反徒欲以虛

辭引歲月遂置南三郡長吏關羽盡逐之權大怒乃遣  
呂蒙督鮮于丹徐忠孫規等兵二萬取長沙零陵桂陽  
三郡使魯肅以萬人屯巴丘以禦關羽權住陸口爲諸  
軍節度蒙到二郡皆服惟零陵太守郝普未下會備到  
公安使關羽將三萬兵至益陽權乃召蒙等使還助肅  
蒙使人誘普普降盡得三郡將守因引軍還與孫皎潘  
璋并魯肅兵並進拒羽於益陽未戰會曹公入漢中備  
懼失益州使使求和權令諸葛瑾報更尋盟好遂分荆  
州長沙江夏桂陽以東屬權南郡零陵武陵以西屬備

備歸而曹公已還權反自陸口遂征合肥合肥未下徹軍還兵皆就路權與寧統甘寧等在津北為魏將張遼所襲統等以死扞權權乘駿馬越津橋得去

二十一年冬曹公次于居巢遂攻濡須

二十二年春權令都尉徐詳詣曹公請降公報使脩好

誓重結婚

二十三年十月權將如吳親乘馬射虎於慶亭慶音撫陵反

馬為虎所傷權投以雙戟虎却廢常從張世擊以戈獲之

二十四年關羽圍曹仁於襄陽曹公遣左將軍于禁之會漢水暴起羽以舟兵盡虜禁等步騎三萬送江陵惟城未拔權內憚羽外欲以為己功牋與曹公乞以討羽自效曹公且欲使羽與權相持以鬪之驛傳權書使曹仁以弩射示羽羽猶豫不能去閏月權征羽先遣呂蒙襲公安獲將軍士仁蒙到南郡南郡太守糜芳以城降蒙據江陵撫其老弱釋于禁之囚陸遜別取宜都獲秣歸枝江夷道還屯夷陵守峽口以備蜀關羽還當陽西保麥城權使誘之羽偽降立幡旗為象人於城上因

遁走兵皆解散尚十餘騎權先使朱然潘璋斷其徑路  
十二月璋司馬馬忠獲羽及其子平都督趙累等於章  
鄉遂定荊州是歲大疫盡除荊州民租稅曹公表權為  
驃騎將軍假節領荊州牧封南昌侯權遣校尉梁寓奉  
貢于漢及令王惇市馬又遣朱光等還

二十五年春正月曹公薨太子丕代為丞相魏王改年  
為延康秋魏將梅敷使張儉求見撫納南陽陰鄴筑陽  
山都中廬五縣民五千家來附冬魏嗣王稱尊號改元  
為黃初二年四月劉備稱帝於蜀權自公安都鄂改名

武昌以武昌下雒尋陽陽新柴桑沙羨六縣為武昌郡  
五月建業言甘露降八月城武昌十一月魏策命封權  
為吳王授金虎符第一至第五左竹使符第一至第十  
以大將軍使持節督交州領荊州牧事仍加九錫令上  
故驃騎將軍南昌侯印綬是歲劉備率軍來伐至巫山秭  
歸使使誘導武陵蠻夷假與印傳許之封賞於是諸縣  
及五谿民皆反為蜀權以陸遜為督督朱然潘璋等以  
拒之遣都尉趙咨使魏魏帝問曰吳王何等主也咨對  
曰聰明仁智雄略之主也帝問其狀咨曰納魯肅於凡

品是其聰也拔呂蒙於行陣是其明也獲于禁而不害  
是其仁也取荊州而兵不血刃是其智也據三州虎視  
於天下是其雄也屈身於陛下是其略也帝欲封權子  
登權以登年幼上書辭封重遣西曹掾沈珩陳謝并獻  
方物立登爲王太子

黃武元年春正月陸遜部將軍宋謙等攻蜀五屯皆破  
之斬其將三月鄱陽言黃龍見蜀軍分據險地前後五  
十餘營遜隨輕重以兵應拒自正月至閏月大破之臨  
陣所斬及投兵降首數萬人劉備奔走僅以身免初權

外託事魏而誠心不款魏欲遣侍中辛毗尚書桓階往  
與盟誓并徵任子權辭讓不受秋九月魏乃命曹休張  
遼臧霸出洞口曹仁出濡須曹真夏侯尚張郃徐晃圍  
南郡權遣呂範等督舟軍以舟軍拒休等諸葛瑾潘璋  
楊粲救南郡朱桓以濡須督拒仁時揚越蠻夷多未平  
集內難未弭故權卑辭上書求自改厲若罪在難除必  
不見置當奉還土地民人乞寄命交州以終餘年文帝  
報曰省君上事款誠深至良用慨然已即詔勅諸軍不  
得妄進若登身朝到夕召兵還此言之誠有如大江權

知魏必責任子遂改年臨江拒守冬十一月大風範等  
兵溺死者數千餘軍還江南曹休使臧霸以輕船五百  
敢死萬人襲攻徐陵燒攻城車殺略數千人將軍全琮  
徐盛追斬魏將尹廬殺獲數百十二月權使太中大夫  
鄭泉聘劉備于白帝始復通也然猶與魏文帝相往來  
至後年乃絕是歲改夷陵為西陵

二年春正月曹真分軍據江陵中洲是月城江夏山改  
四分用乾象歷三月曹仁遣將軍常彫等以兵五千乘  
油船晨渡濡須中洲仁子恭因引軍急攻朱桓桓兵拒

之遣將軍嚴圭等擊破彫等是月魏軍皆退夏四月  
君臣勸即尊號不許劉備薨于白帝五月曲阿言甘露  
降先是戲口守將晉宗殺將王直以衆叛如魏魏以為  
斬春太守數犯邊境六月權令將軍賀齊督麋芳劉邵  
等襲斬春邵等生虜宗冬十一月蜀使中郎將鄧芝來  
聘

三年夏遣輔義中郎將張溫聘于蜀秋八月赦死罪九  
月魏文帝出廣陵望大江曰彼有人焉未可圖也乃還  
四年夏五月丞相孫邵卒六月以太常顧雍為丞相皖

口言木連理冬十二月鄱陽賊彭綺自稱將軍攻沒諸縣衆數萬人是歲地連震

五年春令曰軍興日久民離農畔父子夫婦不能相卹孤甚愍之今北虜縮竄方外無事其下州郡有以寬息是時陸遜以所在少穀表令諸將增廣農畝權報曰甚善令孤父子親自受田車中八牛以爲四耦雖未及古人亦欲與衆均等其勞也秋七月權聞魏文帝崩征江夏圍石陽不克而還蒼梧言鳳凰見分三郡惡地十縣置東安郡以全琮爲太守平討山越冬十月陸遜陳便

宜勸以施德緩刑寬賦息調權納之令有司盡寫科條使郎中褚逢齋以就遜及諸葛瑾意所不安令損益之是歲分交州置廣州俄復舊

六年春正月諸將獲彭綺閏月韓當子琮以其衆降魏七年春三月封子慮爲建昌侯罷東安郡夏五月鄱陽太守周魴僞叛誘魏將曹休秋八月權至皖口使將軍陸遜督諸將大破休於石亭大司馬呂範卒是歲改合浦爲珠官郡

黃龍元年春公卿百司皆勸權正尊號夏四月夏口武

昌並言黃龍鳳皇見丙申蒞南郊即皇帝位是日大赦  
改年追尊父破虜將軍堅爲武烈皇帝母吳氏爲武烈  
皇后兄討逆將軍策爲長沙桓王吳王太子登爲皇太  
子將吏皆進爵加賞初興平中吳中童謠曰黃金車班  
蘭耳闔昌門出天子五月使校尉張剛管篤之遼東六  
月蜀遣衛尉陳震慶權踐位權因與蜀盟作爲誓書遙  
分天下以豫青徐幽屬吳兗冀并涼屬蜀其司州之士  
以函谷關爲界秋九月權遷都建業因故府不改館徵  
上天將軍陸遜輔太子登掌武昌留事

二年春正月魏作合肥新城詔立都講祭酒以教學諸  
子遣將軍衛溫諸葛直將甲士萬人浮海求夷洲及亶  
洲亶洲在海中長老傳言秦始皇帝遣方士徐福將童  
男童女數千人入海求蓬萊神山及仙藥止此洲不還  
歷世相承有數萬家其上人民時有至會稽貨布會稽  
東縣人海行亦有遭風流移至亶洲者所在絕遠卒不  
可得至但得夷洲數千人還

三年春二月遣太常潘濬率衆五萬討武陵蠻夷衛溫  
諸葛直皆以違詔無功下獄誅夏有野蠶成繭大如卵



由拳野稻自生改爲木興縣中郎將孫布詐降以誘魏將王凌凌以軍迎布冬十月權以大兵潛伏於阜陵俟之凌覺而走會稽南始平言嘉禾生十二月丁卯大赦改明年元也

嘉禾元年春正月建昌侯慮卒三月遣將軍周賀校尉裴潛乘海之遼東秋九月魏將田豫要擊斬賀于成山冬十月魏遼東太守公孫淵遣校尉宿舒閭中令孫綜稱藩于權并獻貂馬權大悅加淵爵位

二年春正月詔以公孫淵爲使持節督幽州領青州牧遼東太守燕王大赦天下與淵更始明下州郡咸使聞知特下燕國奉宣詔令三月遣舒綜還使太常張彌執金吾許晏將軍賀達等將兵萬人金寶珍貨九錫備物乘海授淵舉朝大臣自丞相雍已下皆諫以爲淵未可信而寵待太厚但可遣吏兵數百護送舒綜權終不聽淵果斬彌等送其首于魏沒其兵資權大怒欲自征淵尚書僕射薛綜等切諫乃止是歲權向合肥新城遣將軍全琮征六安皆不克還

三年春正月詔曰兵久不輟民困於役歲或不登其寬

諸逋勿復督課夏五月權遣陸遜諸葛瑾等屯江夏沔口孫韶張承等向廣陵淮陽權率大衆圍合肥新城是時蜀相諸葛亮出武功權謂魏明帝不能遠出而帝遣兵助司馬懿拒亮自率水軍東征未至壽春權退還孫韶亦罷秋八月以諸葛恪爲丹楊太守討山越九月朔隕霜傷穀冬十一月太常潘濬平武陵蠻夷事畢還武昌詔復曲阿爲雲陽丹徒爲武進廬陵賊李桓羅厲等爲亂

四年夏遣呂岱討桓等秋七月有雹魏使以馬求易珠璣翡翠瑇瑁權曰此皆孤所不用而可得馬何苦而不聽其交易

五年春鑄大錢一當五百詔使吏民輸銅計銅畢直設盜鑄之科三月武昌言甘露降於禮賓殿輔吳將軍張昭卒中郎將吾粲獲李桓將軍唐咨羅厲等自十月不雨至于夏冬十月彗星見于東方鄱陽賊彭旦等爲亂六年春正月詔中外群寮議長吏遭喪去官詳爲科禁顧譚議以爲奔喪立科輕則不足以禁孝子之情重則本非應死之罪雖嚴刑益設違奪必少若偶有犯者加

其刑則恩所不忍有減則法廢不行愚以為長吏在遠苟不告語勢不得知比選代之間若有傳者必加大辟則長吏無廢職之負孝子無犯重之刑將軍胡綜議以為喪紀之禮雖有典制苟無其時所不得行方今戎事軍國異容而長吏遭喪知有科禁公敢干突苟念聞憂不奔之耻不計為臣犯禁之罪此由科防本輕所致忠節在國孝道立家出身為臣焉得兼之故為忠臣不得為孝子宜定明文示以大辟若故違犯有罪無赦以殺止殺行之一人其後必絕丞相雍奏從大辟其後只今

孟宗喪母奔赴已而自拘於武昌以聽刑陸遜陳其罪行因為之請權乃減宗一等後不得以為比因此遂絕二月陸遜討彭旦等其年皆破之冬十月遣衛將軍全琮襲六安不克諸葛恪平山越重里北屯廬江

赤烏元年春鑄當千大錢夏呂岱討廬陵賊畢還陸口秋八月武昌言騏驎見有司奏言騏驎者太平之應宜改年號詔曰間者赤烏集於殿前朕所親見若神靈以為嘉祥者改年宜以赤烏為元於是改年步夫人卒追贈皇后初權信任校事呂壹壹性苛慘用法深刻太子

登數諫權不納大臣由是莫敢言後壹姦罪發露伏誅  
權引咎責躬乃使中書郎袁禮告謝諸大將因問時事  
所當損益禮還復有詔責數諸葛瑾步騭朱然呂岱等  
悉令盡言直諫以匡不逮

二年春三月遣使者羊術鄭胄將軍孫怡之遼東擊魏  
守將張持高慮等虜得男女零陵言甘露降夏五月城  
沙羨冬十月將軍蔣祕南討夷賊祕所領都督廖式殺  
臨賀太守嚴綱等自稱平南將軍與弟潛共攻零陵桂  
陽及搖動交州蒼梧鬱林諸郡衆數萬人遣將軍呂岱

唐咨討之歲餘皆破

三年春正月詔以民多征役歲又水旱年穀有損而吏  
或不良侵奪民時以致饑饉自今以來督軍郡守其謹  
察非法當農桑時以役事擾民者舉正以聞夏四月大  
赦詔諸郡縣治城郭起譙樓穿澗發渠以備盜賊冬十  
一月民饑詔開倉廩以振貧窮

四年春正月大雪平地深三尺鳥獸死者太半夏四月  
遣衛將軍全琮略淮南決芍陂燒安城邸閣收其人民  
威北將軍諸葛恪攻六安琮與魏將王凌戰于芍陂中

郎將秦晃等千餘人戰死車騎將軍朱然圍樊大將軍諸葛瑾取柤中五月太子登卒是月魏太傅司馬懿救樊六月軍還閏月大將軍瑾卒秋八月陸遜城柤

五年春正月立子和爲太子大赦改禾興爲嘉興百官奏立皇后及四王詔曰今天下未定民物勞瘁且有功者或未錄饑寒者尚未恤猥割土壤以豐子弟崇爵位以寵妃妾孤甚不取其釋此議三月海鹽縣言黃龍見夏四月禁進獻御減太官膳秋七月遣將軍聶友校尉陸凱以兵三萬討珠崖儋耳是歲大疫有司又奏立后

及諸王八月立子霸爲魯王

六年春正月新都言白虎見諸葛恪征六安破魏將謝順營收其民人冬十一月丞相顧雍卒十二月扶南王范旃遣使獻樂人及方物是歲司馬懿率軍入舒諸葛恪自皖遷于柴桑

七年春正月以上大將軍陸遜爲丞相秋宛陵言嘉禾生是歲步騭朱然等各上疏云自蜀還者咸言欲背盟與魏交通多作舟船繕治城郭又蔣琬守漢中聞司馬懿南向不出兵乘虛以掎角之反委漢中還近成都重

已彰灼無所復疑宜爲之備權揆其不然曰吾待蜀不  
薄聘享盟誓無所負之何以致此又司馬懿前來入舒  
旬日便退蜀在萬里何知緩急而便出兵乎昔魏欲入  
漢川此間始嚴亦未舉動會聞魏還而止蜀寧可復以  
此有疑邪又人家治國舟船城郭何得不獲今此間治  
軍寧復欲以禦蜀邪人言苦不可信朕爲諸君破家保  
之蜀竟自無謀如權所籌

八年春二月丞相陸遜卒夏雷霆犯宮闕柱下擊南津  
大橋楹茶陵縣鴻水溢出流漂居民二百餘人秋七月

將軍馬茂等圖逆夷三族八月大赦遣校尉陳勲將屯  
田及作士三萬人鑿句容中道自小其至雲陽西城通  
會市作邸閣

九年春二月車騎將軍朱然征魏柤中斬獲千餘夏四  
月武昌言甘露降秋九月以驃騎步騭爲丞相車騎朱  
然爲左大司馬衛將軍全琮爲右大司馬鎮南呂岱爲  
上大將軍威北將軍諸葛恪爲大將軍

十年春正月右大司馬全琮卒二月權適南宮三月改  
作太初宮諸將及州郡皆義作夏五月丞相步騭卒冬

十月赦死罪

十一年春正月朱然城江陵二月地仍震三月宮成夏四月雨雹雲陽言黃龍見五月鄱陽言白虎見詔公卿百司勉脩所職匡朕不逮以荅休貺

十二年春三月左大司馬朱然卒四月有兩鳥銜鵲墮東館丙寅驃騎將軍朱據領丞相燎鵲以祭

十三年夏五月日至熒惑入南斗秋七月犯魁第二星而東八月丹楊句容及故鄣寧國諸山崩鴻水溢詔原責給貸種食廢太子和處故鄣魯王霸賜死冬十月

魏將文欽僞叛以誘朱異權遣呂據就異以迎欽異等持重欽不敢進十一月立子亮為太子遣軍十萬作堂邑涂塘以淹北道十二月魏大將軍王昶圍南郡荊州刺史王基攻西陵遣將軍戴烈陸凱往拒之皆引還是歲神人授書告以改年立后

太元元年夏五月立皇后潘氏大赦改年初臨海羅陽縣有神自稱王表周旋民間語言飲食與人無異然不見其形又有一婢名紡績是月遣中書郎李崇齎輔國將軍羅陽王印綬迎表表隨崇俱出與崇及所在郡守

令長談論崇等無以異所山川輒遣婢與其神相聞秋  
七月崇與表至權於蒼龍門外為立第舍數使近臣齎  
酒食往表說水旱小事往往有驗秋八月朔大風江海  
涌溢平地深八尺吳高陵松柏斯拔郡城南門飛落冬  
十一月大赦權祭南郊還寢疾十二月驛徵大將軍恪  
拜為太子太傅詔省繇役減征賦除民所患苦

二年春正月立故太子和為南陽王居長沙子奮為齊  
王居武昌子休為琅邪王居虎林二月大赦改元為神  
皇皇后潘氏薨諸將吏數詣王表請福表云去夏四月

權薨時年七十一謚曰大皇帝秋七月葬蔣陵陳壽曰  
權屈身忍辱任才尚計有句踐之奇英人之傑矣故能  
自擅江表成鼎峙之業然性多嫌忌果於殺戮暨臻末  
年彌以滋甚至於讒說殄行胤嗣廢薨豈所謂貽厥孫  
謀以宴翼子者哉其後葉陵遲遂致覆國未必不由此  
也

大皇帝黃武七年黃龍三年嘉禾六年赤烏十三年  
太元元年神鳳元年即位三十一年

會稽王諱亮字子明權少子也權春秋高而亮最少故



尤留意姝全公主常譖太子和母子心不自安因倚權  
意欲豫自結數稱述全尚女勸為亮納赤烏十三年和  
廢權遂立亮為太子以全氏為妃太元元年夏亮母潘  
氏立為皇后冬權寢疾徵大將軍諸葛恪為太子太傅  
會稽太守滕胤為太常並受詔輔太子明年四月權薨  
太子即尊號大赦改元建興是歲魏嘉平四年也閏月  
以恪為帝太傅胤為衛將軍領尚書事上大將軍呂岱  
為大司馬諸文武在位皆進爵班賞冗官加等冬十月  
太傅恪率軍遏巢湖巢音祖城東興使將軍全端守西

城都尉留略守東城十二月朔丙申大風雷電魏  
軍諸葛誕胡遵等步騎七萬圍東興將軍王昶攻南郡  
毋丘儉向武昌甲寅恪以大兵赴敵戊午兵及東興交  
戰大破魏軍韓綜桓嘉等是月雷雨天災武昌端門改  
作端門又災內殿

二年春正月丙寅立皇后全氏大赦庚午王昶等皆還  
二月軍還自東興大行封賞三月恪率軍伐魏夏四月  
圍新城大疫兵卒死者太半秋八月恪引軍還冬十月  
大饗武衛將軍孫峻伏兵殺恪於殿堂大赦以峻為丞

三五四十九  
通志卷之九十九  
相封富春侯十一月有大鳥五見于春申明年改元  
五鳳元年夏大水秋吳侯英謀殺峻覺英自殺冬十一  
月有星彗于斗牛

二年春正月魏鎮東將軍毋丘儉前將軍文欽以淮南  
之衆西入戰于樂嘉閏月壬辰峻及驃騎將軍呂據左  
將軍留贊率兵襲壽春軍及東興聞欽等敗壬寅兵進  
于橐臯欽詣峻降淮南餘衆數萬口來奔魏諸葛誕入  
壽春峻引軍還二月及魏將軍曹珍遇于高亭交戰珍  
收績留贊爲誕別將蔣班所敗於菰陂贊及將軍孫揚

蔣脩等皆遇害三月使鎮南將軍朱異襲安豐不克秋  
七月將軍孫儀張怡林恂等謀殺峻發覺儀自殺恂等  
伏辜陽羨離里山大石自立使衛尉馮朝城廣陵拜將  
軍吳穰爲廣陵太守留略爲東海太守是歲大旱十二  
月作太廟以馮朝爲監軍使者督徐州諸軍事民饑軍  
士怨畔

太平元年春二月朔建業火峻用征北大將軍文欽計  
將征魏八月先遣欽及驃騎呂據車騎劉纂鎮南朱異  
前將軍唐咨自江都入淮泗九月丁亥峻卒以從弟偏

將軍繇爲侍中武衛將軍領中外諸軍事召還據等聞  
繇代峻大怒己丑大司馬呂岱卒壬辰太白犯南斗據  
欽咨等表薦衛將軍滕胤爲丞相繇不聽癸卯更以胤  
爲大司馬代呂岱駐武昌據引兵還欲討繇繇遣使以  
詔書告喻欽咨等使取據冬十月丁未遣孫憲及丁奉  
施寬等以舟兵逆據於江都遣將軍劉丞督步騎攻胤  
胤兵敗夷滅己酉大赦改年辛亥獲呂據於新州十一  
月以繇爲大將軍假節封永康侯孫憲與將軍王惇謀  
殺繇事覺繇殺惇迫憲令自殺十二月使五官中郎將

刁玄告亂于蜀

二年春二月甲寅大雨震電乙卯雪大寒以長沙東部  
爲湘東郡西部爲衡陽郡會稽東部爲臨海郡豫章東  
部爲臨川郡夏四月亮臨正殿大赦始親政事繇所表  
奏多見難問又科兵子弟年十八已下十五以上得三  
千餘人選大將子弟年少有勇力者爲之將帥亮曰吾  
立此軍欲與之俱長日於苑中習焉五月魏征東大將  
軍諸葛誕以淮南之衆保壽春城遣將軍朱成稱臣上  
疏又遣子覲長史吳綱諸牙門子弟爲質六月使文欽

唐咨全端等步騎三萬救誕朱異自虎林率衆襲夏口  
夏口督孫壹奔魏秋七月絀率衆救壽春次于鑊里朱  
異至自夏口絀使異爲前部督與丁奉等將介士五萬  
解圍八月會稽南部反殺都尉鄱陽新都民爲亂廷尉  
丁密步兵校尉鄭胄將軍鍾離牧率軍討之朱異以軍  
士乏食引還絀大怒九月朔己巳殺異於鑊里辛未絀  
自鑊里還建業甲申大赦十一月全緒子禕儀以其母  
奔魏十二月全端懌等自壽春城詣司馬師

三年春正月諸葛誕殺文欽三月司馬師克壽春誕及

左右戰死將吏已下皆降秋七月封故齊王奮爲章安  
侯詔州郡伐宮材自八月沈陰不雨四十餘日亮以絀  
專恣與太常全尚將軍劉丞謀誅絀九月戊午絀以兵  
取尚遣弟恩攻殺丞於蒼龍門外召大臣會宮門黜亮  
爲會稽王時年十六

會稽王建興五鳳各二年太平三年即位七年

景皇帝諱休字子烈權第六子年十三從中書郎射慈  
郎中盛冲受學太元二年正月封琅邪王居虎林四月  
權薨休弟亮承統諸葛恪秉政不欲諸王在濱江兵馬

之地徙休於丹楊郡太守李衡數以事侵休休上書乞  
徙他郡詔徙會稽居數歲夢乘龍上天顧不見尾覺而  
異之孫亮廢已未孫綝使宗正孫楷與中書郎董朝迎  
休休初聞問意疑楷朝具述綝等所以奉迎本意留一  
日二夜遂發十月戊寅行至曲阿有老公干休叩頭曰  
事久變生天下喁喁願陛下速行休善之是日進及布  
塞亭武衛將軍恩行丞相事率百僚以乘輿法駕迎於  
永昌亭築宮以武帳爲便殿設御坐己卯休至望便殿  
止任使孫楷先見恩楷還休乘輦進群臣再拜稽首休

升便殿謙不即御坐止東廂戶曹尚書前即階下讚奏  
丞相奉璽符休三讓群臣三請休曰將相諸將咸推寡  
人寡人敢不承受璽符群臣以次奉引休就乘輿百官  
陪位綝以兵千人迎於半野拜于道側休下車答拜即  
日御正殿大赦改元是歲魏甘露二年也

永安元年冬十月壬午詔以大將軍綝爲丞相荊州牧  
增食五縣武衛將軍恩爲御史大夫衛將軍中軍督封  
縣侯威遠將軍授爲右將軍縣侯偏將軍幹雜號將軍  
亭侯長水校尉張布輔導勤勞以布爲輔義將軍封永

康侯董朝親迎封爲鄉侯又詔曰丹楊太守李衡以往  
事之嫌自拘有司夫射鉤斬祛在君爲君遣衡還郡勿  
令自疑己丑封孫皓爲烏程侯皓弟德錢唐侯謙永安  
侯十一月甲午風四轉五復蒙霧連日緄一門五侯皆  
典禁兵權傾人主有所陳述敬而不違於是益恣休恐  
其有變數加賞賜丙申詔前日與大將軍定策告廟人  
名依故事應加爵位者促施行之戊戌詔曰大將軍掌  
中外諸軍事統煩多其加衛將軍御史大夫恩侍中  
與大將軍分省諸事壬子詔曰諸吏家有五人三人兼

重爲役父兄在都子弟給郡縣吏旣出限米軍出又從  
至於家事無經護者朕甚愍之其有五人三人爲役聽  
其父兄所欲留爲留一人除其米限軍出不從又曰諸  
將吏奉迎陪位在永昌亭者皆加位一級頃之休聞緄  
逆謀陰與張布圖計十二月戊辰臘百僚朝賀公卿升  
殿詔武士縛緄即日伏誅己巳詔以左將軍張布討姦  
臣加布爲中軍督封布弟惇爲都亭侯給兵三百人惇  
弟恂爲校尉詔置學官立五經博士科見吏之中及將  
史子弟有志好學者各令就業一歲課試差其品第加

以位賞

二年春正月震電三月備九卿官詔廣開田業輕其賦稅差科彊羸課其田畝務令優均令諸卿尚書悉心咨度以稱朕意

三年春三月西陵言赤鳥見秋用都尉嚴密議作浦里塘會稽郡謠言王亮當還為天子而亮宮人告亮使巫禱祠有惡言有司以聞黜為候官侯遣之國道自殺衛送者伏罪以會稽南部為建安郡分宜都置建平郡

四年夏五月大雨水泉涌溢秋八月遣光祿大夫周亦

石偉巡行風俗察將吏清濁民所疾苦為黜陟之詔九月布山言白龍見是歲安吳民陳焦死埋之六日更牛穿土中出

五年春二月白虎門北樓災秋七月始新言黃龍見八

月壬午大雨震電水泉涌溢乙酉立皇后朱氏戊子立

子霍為太子大赦

休為四男作名字欲令難犯而易避皆鈔舊文會合作之太子名霍霍音

如湖水灣澳之灣字箇箇音如迄今之迄今子名霍霍音如兕觥之觥字罪罪音如玄磧首之磧次子名薛薛音如草莽之莽字显显音如舉物之舉次子名寇寇音如褒衣下寬大之褒字熒熒音如有所擁持之擁冬

十月以衛將軍濮陽興為丞相廷尉丁密光祿勳孟宗

爲左右御史大夫休以丞相興及左將軍張布有舊恩  
委之政事布典宮省興關軍國休銳意於典籍欲異覽  
百家之言又好射雉春夏之間常晨出夜還唯此時舍  
書休欲與博士祭酒韋曜博士盛冲講論道藝曜冲素  
皆切直布恐入侍發其陰失令已不得專因妄飾說以  
罪過之休責布曰此特君等恐曜冲輩道臣下姦變之  
事故耳布懼叩頭陳謝休雖心不能悅然恐布以此疑  
懼竟如布意廢其講業不復使冲等入是歲使察戰到  
交阯調孔爵大豬

六年夏四月泉陵言黃龍見五月交阯郡吏呂興等反殺  
太守孫譖譖先是科郡上手工千餘人送建業而察戰  
至恐復見取故興等因此扇動兵民招誘諸夷也冬十  
月蜀以魏見伐來告癸未建業石頭小城火燒西南百  
八十丈甲申使大將軍丁奉督諸軍向魏壽春將軍留  
平別詣施績於南郡議兵所向將軍丁封孫異如沔中  
皆救蜀蜀主劉禪降魏問至然後罷呂興旣殺孫譖使  
使如魏請太守及兵丞相興建取屯田萬人以爲兵分  
武陵爲天門郡



七年春正月大赦二月鎮軍陸抗撫軍步協征西將軍留平建平太守盛曼率衆圍蜀巴東守將羅憲夏四月魏將新附督王稚浮海入句章略長吏賞林及男女二百餘口將軍孫越徼得一船獲三十人秋七月海賊破海鹽殺司鹽校尉駱秀使中書郎劉川發兵廬陵豫章民張節等爲亂衆萬餘人魏使將軍胡烈步騎二萬侵西陵以救羅憲陸抗等引軍退復分交州置廣州壬午大赦癸未休寢疾口不能言乃手書召丞相興入令子羣出拜之休把興臂而指羣以託之頃之而薨時年三

十謚曰景皇帝

景帝永安七年

歸命侯諱皓字元宗權子和之子一名彭祖字皓宗孫林立封皓爲烏程侯遣就國西湖民景養相皓當大貴皓陰喜而不敢泄休薨是時蜀初亡而交趾攜叛國內震懼貪得長君左典軍萬彧昔爲烏程令與皓相善稱皓才識明斷是長沙桓王之儔也又加之好學奉遵法度屢言之於丞相濮陽興左將軍張布興布說休妃太后朱欲以皓爲嗣朱曰我寡婦人安知社稷之慮苟吳

國無隕宗廟有賴可矣於是遂迎立皓時年二十三改元大赦是歲魏咸熙元年也

元興元年八月以上大將軍施績大將軍丁奉為左右大司馬張布為驃騎將軍加侍中諸增位班賞一皆如舊九月貶太后為景皇后追謚父和曰文皇帝尊母何為太后十月封休太子羣為豫章王次子汝南王次子梁王次子陳王立皇后滕氏皓既得志麤暴驕盈多忌諱好酒色大小失望興布竊悔之或以譖皓十一月誅興布十二月孫休葬定陵封后父滕牧為高密侯舅何

洪等三人皆列侯是歲魏置交阯太守之郡司馬師為魏相國遣昔吳壽春城降將徐紹孫或銜命齎書陳事勢利害以申喻皓

甘露元年三月皓遣使隨紹或報書曰知以高世之才處宰輔之任漸導之功勤亦至矣孤以不德階承統緒思與賢良共濟世道而以壅隔未有所緣嘉意尤著深用依依今遣光祿大夫紀陟五官中郎將弘璆宣明至懷紹行到濡須召還殺之徙其家屬建安始有白紹稱美中國者故也夏四月蔣陵言甘露降於是改年大赦

通志卷第九  
三十一  
秋七月皓逼殺景后朱氏不在正殿於苑中小屋治  
喪衆知其非疾病莫不痛切又送休四子於吳小城尋  
復追殺大者二人九月從西陵督步闡表徙都武昌御  
史大夫丁固右將軍諸葛靚鎮建業陟璆至洛陽遇司  
馬師卒十一月乃遣還皓至武昌又大赦以零陵南部  
爲始安郡桂陽南部爲始興郡十二月晉受禪

寶鼎元年正月遣大鴻臚張儼五官中郎將丁忠弔祭  
晉文帝及還儼道病死忠說皓曰北方守戰之具不設  
弋陽可襲而取皓訪群臣鎮西大將軍陸凱曰夫兵不

得已而用之耳且三國鼎立已來更相侵伐無歲寧居  
今疆敵新并巴蜀有兼土之資而遣使求親欲息兵役  
不可謂其求援於我今敵形勢方彊而欲徼幸求勝未  
見其利也車騎將軍劉纂曰天生五才誰能去兵譎詐  
相雄有自來矣若其有闕庸可棄乎宜遣間諜以觀其  
勢皓陰納纂言且以蜀新平故不行然遂自絕八月所  
在言得大鼎於是改年大赦以陸凱爲左丞相常侍萬  
或爲右丞相冬十月永安山賊施但等聚衆數千人劫  
皓庶弟永安侯謙出烏程取孫和陵上鼓吹曲蓋比至

建康衆萬餘人丁固諸葛靚迎之於牛屯大戰但等敗走獲謙謙自殺分會稽爲東陽郡分吳丹楊爲吳興郡以零陵北部爲邵陵郡十二月皓還都建業衛將軍滕牧留鎮武昌

二年春大赦右丞相萬彧上鎮巴丘夏六月起顯明宮冬十二月皓移居之是歲分豫章廬陵長沙爲安成郡三年春二月以左右御史大夫丁固孟仁爲司徒司空秋九月皓出東關丁奉至合肥是歲遣交州刺史劉俊前部督脩則等入擊交阯爲晉將毛炆等所破皆死兵

### 散還合浦

建衡元年春正月立子瑾爲太子及淮陽東平王冬十月改年大赦十一月左丞相陸凱卒遣監軍虞汜威南將軍薛珣蒼梧太守陶璜由荊州監軍李勗督軍徐存從建安海道皆就合浦擊交阯

二年春萬彧還建業李勗以建安道不通利殺導將馮斐引軍還三月天火燒萬餘家死者七百人夏四月左大司馬施績卒殿中列將何定白少府李勗枉殺馮斐擅徹軍退還勗及徐存家屬皆伏誅秋九月何定將兵

五千人上夏口獵都督孫秀奔晉是歲大赦

三年春正月晦皓舉大衆出華里皓母及妃妾皆行東觀令華覈等固爭乃還是歲汜璜破交阯禽殺晉所置守將九真日南皆還屬大赦分交阯爲新昌郡諸將破扶巖置武平郡以武昌督范慎爲太尉右大司馬丁奉司空孟仁卒西苑言鳳皇集改明年元

鳳皇元年秋八月徵西陵督步闡闡不應據城降晉遣樂鄉都督陸抗圍取闡闡衆悉降闡及同計數十人皆夷三族大赦是歲右丞相萬或被譴憂死徙其子弟於

廬陵何定姦穢發聞伏誅皓以其惡似張布追改定名爲布

二年春三月以陸抗爲大司馬司徒丁固卒秋九月改封淮陽爲魯東平爲齊又封陳留章陵等九王凡十一王王給三千兵大赦皓愛妾或使人至市劫奪百姓財物司市中郎將陳聲素皓幸臣也恃皓寵遇繩之以法妾以愬皓皓大怒假他事燒錐斷聲頭投其身於四望之下是歲太尉范慎卒

三年會稽妖言章安侯奮當爲天子臨海太守奚熙與

會稽太守郭誕書非論國政誕但白熙書不白妖言送  
付建安作船遣三郡督何植收熙熙發兵自衛斷絕海  
道熙部曲殺熙送首建業夷三族秋七月遣使者二十  
五人分至州郡科出亡叛大司馬陸抗卒自改年及是  
歲連大疫分鬱林爲桂林郡

天冊元年吳郡言掘地得銀長一尺廣三分刻上有年  
月字於是大赦改年

天璽元年吳郡言臨平湖自漢末草穢壅塞今更開通  
長老相傳此湖塞天下亂此湖開天下平又於湖邊得

石函中有小石青白色長四寸廣二寸餘刻上作皇帝  
字於是改年大赦會稽太守車浚湘東太守張詠不出  
筭緡就在所斬之徇首諸郡秋八月京下督孫楷降晉  
鄱陽言歷陽山石文理成字凡二十二云楚九州渚吳九  
州都揚州士作天子四世治太平始又吳興陽羨山有  
空石長十餘丈名曰石室在所表爲大瑞乃遣兼司徒  
董朝兼太常周處至陽羨縣封禪國山明年改年大赦  
以協石文焉

天紀元年夏夏口督孫慎出江夏汝南燒略居民初騶

子張倣多所譖白累遷爲司直中郎將封侯甚見寵愛  
是歲姦情發聞伏誅

二年秋七月立成紀宣威等十一王王給三千兵大赦  
三年夏郭馬反馬本合浦太守脩允部曲督允轉桂林太  
守疾病住廣州先遣馬將五百兵至郡安撫諸夷允死  
兵當分給馬等累世舊軍不樂離別皓時又科實廣州  
戶口馬與部曲將何典王族吳述殷興等因此恐動兵  
民合聚人衆攻殺廣州督虞授馬自號都督交廣二州  
諸軍事安南將軍興廣州刺史述南海太守典攻蒼梧

族攻始興八月以軍師張悌爲丞相牛渚都督何植爲  
司徒執金吾滕循爲司空未拜轉鎮將軍假節領廣州  
牧率萬人從東道討馬興族遇於始興未得前馬殺南  
海太守劉略逐廣州刺史徐旗皓又遣徐陵督陶濬將  
七千人從西道命交州牧陶璜部伍所領及合浦鬱林  
諸郡兵當與東西軍共擊馬有鬼目菜生工人黃耆家  
依緣棗樹長丈餘莖廣四寸厚三分又有買菜生工人  
吳平家高四尺厚三分如枇杷形廣尺八寸下莖廣五  
寸兩邊生葉綠色東觀案圖名鬼目作芝草買菜作平

慮草遂以耆爲侍芝郎平爲平慮郎皆銀印青綬冬晉  
命鎮東大將軍司馬佺向涂中安東將軍王渾揚州刺  
史周浚向牛渚建威將軍王戎向武昌平南將軍胡奮  
向夏口鎮南將軍杜預向江陵龍驤將軍王濬廣武將  
軍唐彬浮江東下太尉賈充爲大都督量宜處要盡軍  
勢之中陶潛至武昌聞北軍大出停駐不前初皓每宴  
會群臣無不咸令沈醉置黃門郎十人特不與酒侍立  
終日爲司過之吏宴罷之後各奏其闕失迕視之咎謬  
言之愆罔有不舉大者即加威刑小者輒以爲罪後宮  
數千而采擇無已又激水入宮宮人有不合意者輒殺  
流之或剝人之面或鑿人之眼岑昏險諛貴幸致位九  
列好興功役衆所患若是以上下離心莫爲皓盡力蓋  
積惡已極不復堪命故也

四年春立中山代等十一王大赦沈彬所至則土崩瓦  
解靡有禦者預又斬江陵督伍延渾復斬丞相張悌丹  
楊太守沈瑩等所在戰克三月丙寅殿中親近數百人  
叩頭請皓殺岑昏皓惶憤從之戊辰陶濬從武昌還即  
引見問水軍消息對曰蜀船皆小今得二萬兵乘大船



戰自足擊之於是合衆受濟節鉞明日當發其夜衆悉  
逃走而王濬順流將至司馬卬王渾皆臨近境皓用光  
祿勳薛瑩中書令胡冲等計分遣使奉書於濬卬渾遣  
太常張夔等奉所佩印綬以請命於卬壬申王濬最先  
到於是受皓之降解縛焚櫬延請相見卬以皓致印綬  
於已遣使送皓皓舉家西遷以太康元年五月丁亥集  
于京邑四月甲申詔曰孫皓窮迫歸降前詔待之以不  
死今皓垂至意猶愍之其賜號爲歸命侯進給衣服車  
乘田三十頃歲給穀五千斛錢五十萬絹五百匹繇五

百斤皓太子瑾拜中郎諸子爲王者孫郎中

五年皓死于洛陽時年四十二葬河南縣界初陸抗之  
克步闡也皓意張大乃使尚廣筮并天下遇同人之頤  
廣對曰吉庚子歲青蓋當入洛陽故皓不脩其政而恒  
有窺上國之意是歲也實在庚子云

歸命侯元興元年甘露元年寶鼎三年建衡二年

鳳皇二年天冊元年天璽元年天紀四年即位十

六年

右吳四主合五十九年爲晉所滅

吳紀第九

通志九

通志卷第六

四

